

He Whakatau

Me mātua pānui kia marama rawa koe i ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. He paki o neherā e tohutohu ana, e whakatūpato ana i te tangata. Ki te kore e mau tika, e pono rānei ki ngā kōrero a te pakeke he raruraru kei te haere.

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Matapakihia ētahi kōrero o nehe rā e mōhio ana te ākonga mō tētahi tapanga i tētahi whenua (Te Ika-a-Māui), tētahi awa (Manawatū), tētahi moana (Raukawa), me tētahi maunga (Maungaraki), pēnei tonu i tēnei o ngā paki, arā, te tapanga o ngā pae maunga kei Te Waipounamu. He ako kei ngā mea katoa nō reira he aha ētahi o ngā ako kei roto i tēnei paki?

He Matapaki

Tirohia te pai o te pānui a te ākonga


I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e marama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitiore, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.



He whakapuaki māramatanga

1. He aha ngā kupu a Ranginui ki ana tama i mua i tō rātou wehenga atu?
2. I aha rātou i te wā ka pōuri te rangi, ka heke te ua, ka pupuhi te hau i tō rātou hekenga ki Aotearoa?
3. He aha te whakamutunga atu o ngā tama a Ranginui?
4. Ko ēhea ngā kāhui motu nunui o Aotearoa nei?
5. He aha atu anō ētahi kōrero paki e mōhio ana koe i hurihia ai te tangata hei wāhi?

Ngā whakautu ki ngā whakapuaki māramatanga

1. Kia maumahara koutou, “Kaua rawa e wehi. Ahakoa te aha kia mau ki ngā karakia hei kawē i a koutou.”
2. I tino wehi ngā tokowhā.
3. I hurihia rātou hei maunga kōhatu teitei.
4. Te Ika-a-Māui, me Te Waka-o-Māui.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuatanga o te pukapuka nei.

Te pūtaka

T He āta titiro, he tautuhi i ngā kupu tūāhua mai te pukapuka.

He whakatakinga ā-roro, he whakaharatau

E marama ai te ākonga ki ētahi rerenga whakaatu āhua me matapaki rawa te takoto me te whakamahi o aua rerenga. I mua i te pānuitanga a te ākonga me kōrero rawa kōrua i tētahi anga pai hei whakaatu i ngā rerenga tūāhua kia kitea ai te ātaahua o ngā kupu i roto i te haka. Hei tauira (wh. 5):

Tā te pukapuka	Tā te ākonga me te pouako
– He tino ngā rā me ngā pō e rere ana.	– Ka rere i te pō, i te ata, i te pō, i te ata.
– ka pōuri te rangi, ka heke te ua.	– Auē, auē! Pōuri, pōuri. Auē, auē! Ka ua, ka ua.

Me tauira tētahi haka mai i te akomanga kia kite ai te ākonga i ngā wāhanga (te tapanga, te kaupapa, te tauwhāinga, te piki o te puehu, te whakatau), heoi, ko te tino rerekē o te haka he tuhi ā whiti kē. Kotahi neke atu rānei te maha o ngā whiti, engari ka kawē haere tonu ngā whiti i te kaupapa. Kei te kaituhi anō te tikanga ki te whakatau e hia ngā whiti o tana haka. Ko te mea nui kē ko te kaupapa o te haka.